

S. W. 402



Cim. Qu. 4954

Clas. 4. D. in 4to. 77.

STANISLAI SOCOLOVII

QVÆSTOR,

Siue

De parsimonia atq; frugalitate.

Ad Martinum Lesnovolscium,  
Castellanum Podlachiæ.



CRACOVIAE,

In Officina LAZARI: Anno Domini

1758 9.



M. IOANNES FOXIVS.

*Profusus damnans opibus benè consulit uti,  
Ingenio similis, magne Luculle, tuo.*

M. ANDREAS SCHOENEVS.

*Frugaliore vis tuos  
Esse, quia quod desit vides.  
Non Lechiæ desunt opes,  
Sola ars fruendi deficit.*

*Monij S. Crucis in caluo monte S. Crucis Ord. S. Bened.  
Class. 4. D. in 4<sup>to</sup> N.º 77.*

## AD MARTINVM LESNOVOLSCIVM,

Castellanum Podlachiaë, virum illustrem,

**N**ON Nignomas, Martine Lesnovolschi, Philo-  
sophiam à Platone animi medicinam dici,  
eiusq; omnibus morbis, vel obsistere, vel eos peni-  
tus auferre. Sed nec illud quidem tibi obscurum  
est; ut singulos homines, ita & gentes atque Res-  
pub. uniuersas suis morbis non carere, atque v-  
namquamque aliquo proprio & peculiari. Docent  
hoc præclare apud Liuium Rhodiorum legati: Tam  
ciuitatum, quam singulorum hominum mores sunt,  
inquiunt: gentes quoque aliæ inacundæ, aliæ au-  
daces, quædam timidæ, in vinum, & uenerem  
proniores sunt aliæ. Atheniensium populum, fa-  
ma est, celerem, & supra vires audacem esse ad  
conandum: Lacedæmoniorum cunctatorem, &  
vix in ea, quibus fudit, ingredientem. Non nega-  
uerim, totam Asiæ regionem inaniora parere inge-  
nia, & nostrorum tumidiorem sermonem. Et illi  
quidem hæc de suis. Gentis autem nostræ quasi po-  
pulare vitium est, profusio quædam ac prodigalitas,  
A 2 nulla



nulla ratione suscepta. Qui morbus, et si prima facie ac fronte, non ita turpis aut exitiosus esse, imò etiam aliquid splendoris ac magnificentiae habere videatur: si tamen penitus rem inspicias, maximè lethalis atque perniciosus est; quod plus re ipsa experimur, quam ut verbis explicari debeat. Rectè etenim dicebat Aristoteles, dissipationem patrimoniorum, sui ipsius interitum esse; propterea quòd patrimonio ac facultatibus viuitur. Et queruntur quidem de ista calamitate omnes: omnibus ea grauis & molesta est; medicam tamen manum adhibet nemo. Quod cum viderem, aliquid ex eo philosophiae iatrio, pro hac mea afflicta valetudine, hoc tædiofissimo contagionis tempore, de hac re afferendum esse putavi. In quo, quantum præstiterim, iudicabunt cæteri: prodesse certè cupio. Tuum autem, hunc qualemcumq; nostrum laborem, esse volui; idq; merito tuo. Tecum enim sæpè hac de re inter cætera illis nostris, si non splendidissimis, iucundissimis tamen temporibus, quibus te præsentì huic fortunæ parabam, differebamus: quorum gustum, nondum te amisisse, ex superioribus tuis amantissimis ad me literis cognoui. Neque enim ex eo genere hominum es, qui similes sunt illis pueris, qui, ubi primùm à lacte remoti fuerint, omnem suarum nutricum curam ab-

iiciunt

iiciunt. Sed neque illorum, qui statim ac limen aulae & fori attigerint, vixq; scholæ pulverem excusserint, legem sibi & necessitatem impositam esse putant; ut literis detrahant, illisq; perpetuum bellum indicant, earumq; osiores & inimici sint. Tu quidem, me herculè, plus in luce hominum, quam in spatiis Lycæi, quotidie etiam ex libris discis, discebasq; semper, quæ aliquando ipsi cum magna voluptate nostræ ex te audire solebamus. Tantò autem minus cum illis aliquid commune habes, quos, ubi fortuna paululum euexerit, primùm sui, deinde omnium obliuiscuntur. Probasti hæc non ita pridem abundè omnia, qui inter tot tuas occupationes, & horum temporum difficultates, tanto locorum interuallo à nobis disiectus, ad latus ipsius optimi Regis, necessitatum SOCOLOVII, præceptoris quondam tui, oblitus non fueris; sed illas munificè & liberaliter ex tuo subleuâris. Meritò ergo te DEVS immortalis, in eo collocavit loco, in quo & virtus tua illustrior esset, & tu ipse pluribus commodare posses. In quo, ut te diu saluū et incolumem, cū laudis ac nominis tui splendore et decore, pro patriæ utilitate, literarumq; (quæ certè apud nos gratis patronis opus habent) incrementis conseruare velit, etiam atq; etiam vehementer opto. Quod equidem faciet, si te omniaq; consilia tua, sub



*alas protectionis eius, ut quidem facis, condideris:  
 & nunquam à præceptis & mandatis ipsius recesseris;  
 si ubique beneficia eius recognoueris, atque ad  
 laudem & gloriam nominis illius retuleris omnia.*

*Vale, & illum virum esse non puta, cui non cre-  
 scit animus in periculorum  
 accessione.*

Magnum vectigal parsimonia.

STANI-

STANISLAI SOCOLOVII

QVÆSTOR.

Siue

*De Parsimonia atque frugalitate.*

æææ

QVÆSTOR & MEMPSIMOERVS.



VÆSTOR. Probare non pos-  
 sum ingenium istud, institutum-  
 que tuum, huncque erga patri-  
 am sensum & affectum: tua par-  
 uipendis: nidi tui te poenitet:  
 arridet tibi nihil: fastidis om-  
 nia: semper tibi deformis illa, obscura, pauper,  
 sterilis, inops, parumque alma, ut ita dicam, &  
 vitalis, patria videtur. In qualia quondam inge-  
 nia, Lacedæmone animaduerti legibus solitum  
 esse, testis est Demosthenes, & alii multi. Boni e-  
 nim ciuis, prima commendatio est, patriam ama-  
 re. Amabit autem nunquam, nisi eam aliquid pul-  
 chrum & excellens esse iudicauerit. πολὺς ποὶς fu-  
 it Vlysses, πολλὰ ὥστεα ἴδεν, Ithacam tamen suam  
 in asperrimis saxulis tanquam nidulum affixam  
 sapi-



sapientiss. ille vir, post viginti annorum peregrinationes, Rhodo, Cypro, aliisque florentissimis insulis, immortalitati denique ipsi anteposuit. Spartam igitur quam nactus es, orna, vel excede. MEMPSIMOERVS. Ita est: nam & ipse mihi, postquam huc redii, eo nomine displicere incipio: videoque me aliis molestum esse, inimicosque sine causa parare. Sed quid faciam? quid enim tibi in eo loco placeat, quid laudes, ubi nihil debite, nihil ordine, nihil ex legibus fit? Nam ut cætera omittam, hæc ipsa paupertas, quem non moueat? publicæ opes nullæ, ærariū exhaustum, priuatorum hominum fortunæ absumptæ, hostes potentes vndiq. plurimi. *ἐπεὶ οὖν* igitur Pythagoræ mihi in posterum sequenda erit. QVAES. Erras: nam & hæc ipsa, quæ recenset mala, hominum vitia sunt potius, disciplinæque corruptæ atque dissolutæ, quàm soli & patriæ. Quam quidē, si ego aut insulis fortunatis, aut Aegypti fecunditati, cuius ipse Nilus cultor & irrigator esse dicitur; aut vicinæ huic nostræ quondam felici Pannoniæ comparare vellem; nimis fortasse amans patrii soli viderer. Si verò eam esse dico, cuius neminem bonum meritò poenitere possit, huius me iudicii pudebit nunquam. Mitto portus, mit-

to em-

to emporia, mitto flumina, frumenti copiam, pascuorum vbertatem, quæ tot exterarum gentes alunt, equos, iumenta, victus facilitatem, mitto alia. Viri certè & vires, quæ primæ & summæ opes Reipub. putantur, nobis non desunt, nec defuerunt vnquam. Ars fruendi bonis nostris nobis deest, illaque ipsa, cuius nomine omnes virtutes complexus est Tullius, frugalitas, quæ iam ad vltimū extremum multorum vitio mihi deducta esse videtur. MEM. Explices id obsecro, atque aliquantum in hoc loco consistas, si otium est, & si vis. QVAES. Res difficilis & odiosa, ut vides, & quæ multos offendere potest: faciam tamen tua causa aliquid, si modò potero; ac quid de toto hoc genere, siue usu & abusu bonorum, siue frugalitate sentiam, paucis (quoniam otii aliquid nactus sum) explicabo. Hoc est, ut primū, quod res, & ad quæ extrema deducta sit, ostendam: deinde gradus, quibus eò deueniri solet, demonstrarem: postea incommoda eius labis, referam. Minus quidem grata me dicturum video; sed me vera pro gratis loqui, etsi ingenium meum non moneret, res ipsa cogit. Tu, si quid prætermisero, aut si quid aliud senseris, suggere. MEM. Perplacet, tu rem strenuè aggredere, nec quenquam respicias.

B

QVAES.



QVÆS. Faciamus ergò denuò hoc tanquam totius causæ initium, cum de usu bonorum publicorum, & priuatorum dicimus, non de re parua nos disputare. Nisi enim priuata res rectè in ciuitate administretur (dicebat Plato) frustrà rem communem quispiam speret robur & firmitatem aliquam in Repub. habituram: Et qui sua, inquit Imperator, per intemperantiam abliguriuerit, cum deest, aliena sequatur oportet. Itaque publica & priuata bona, veteres sapientes, nunc *οὐσίαν*, id est, substantiam, quòd hæc quasi fundamentum vitæ sint: nunc rem, cum qua consilium simul quæri & amitti dicebat Comicus: nunc viscera, quòd his homo uiuat: nunc sanguinem, quòd his vegetetur, his alatur: nunc neruū, quòd in his tota vis & robur sit: nunc denique vitam appellare solebant. Bonis igitur Reipub. absumtis, bonis priuatorum profusis, substantiam, rem, neruos, viscera, sanguinem, vitam denique ipsam, cum ciuium ipsorum, tum vniuersæ Reipub. absumi oportet. Hæc autem res tanta, ad quod extremum, non apud nos solùm, sed planè vbique quodam modo deuoluta sit, pudet dicere. Quid enim nūc passim hominibus, tam priuatim, quàm publicè, ex sua substantia, ex suo neruo, ex suo sanguine,

sanguine, ex suis visceribus, ex sua denique vita superest? Nihil aliud, crede mihi, præter nomina. Non dico nomina, hoc est, debita; quanquã etsi hoc modo dixero, nihil aberrauero. Quantū enim aut publicè, aut priuatim, vbique debeat, tu ipse rectè vides; hæcque nomina ipsa multorum malorum causa sunt; ita vt non immeritò inter cæteras salutationes Græcorum, hæc fuerit vna ex præcipuis, *ὀφελὲν μὴδενί*, hoc est, vt nihil cuiquam debeas. Sed cum dico, nihil passim homines præter nomina habere, id ita intelligo: Si quis bona Reipub. agros, rura, oppida, pertranseat, (quod mihi sæpè pro hoc meo munere contigit) & quærat, cuius sit hic ager, hoc rus, istud oppidum? responderi solet, Reipub. si ampliùs quæras, quis ipsos fructus, quis prouentus, ex illo agro ex hoc oppido, accipiat? mox illum, vel illam, vix non & illud, accipere respondent. Et bona quidem, bona Reipub. esse, bona regalia esse; sed Rempub. sed Regem inde nihil capere. Atque hoc est nomina rerum, non res ipsas habere. Eam enim tu rem meam appelles volo, qua ego fruor, cuius fructus ad me pertinent, cuius dominus sum: hoc autem, quod tu dicis, ludibrium potiùs quàm certa possessio est. Quomodo enim id me-

um, vbi



um, vbi me fame nonnunquam, nisi aliunde parem ac prouideam, perire contingit? Sic igitur Respublicæ, sic Reges, præter nomina, parum vel nihil habent. Sed & priuati item hominis, patritii alicuius, aut equitis, transeo rus, agrum, oppidū, cuius sit quæro; similiter respondet quis, huius vel illius esse, addit Magnificum & illustre ac vetustum aliquod ex annalibus nomen. Quis autem fructus, quis prouentus eius agri capit? ille & ille aduena. quis? mercator, vsurarius, Iudæus nonnunquam. Quid hoc aliud est, quàm non iam res, sed nomina rerum illum Magnificū habere? MEM. Idem igitur sentis, quod ipse modò dixi, nos non ditissimos esse. QVAES. Non idem certè, nam hæc, vitia hominum sunt potius, vt vides, quàm patriæ. Si enim rectè & publicis & priuatis bonis vteremur, abundaremus, crede mihi, omnes; nam neque nunc, Dei gratia, ita egemus, vt non facilè nos tueri possimus. Quæ vitia, si loci aut regionis essent, eadem semper manerent, corrigi non possent; hæc modica disciplinæ intentione facilè corriguntur.

MEM. Vera dicis. non pugno. Sed quibus tandem modis & vitiis eò quò dixisti deduci solet, paucis

paucis explica: idq. ordine & numero certo, quod Quæstorem decet, quò rectius eorū, quæ à te dicentur, meminisse possim. Q. Multa quidem illa, & quæ breui tempore haud ita facilè recenseri possint; ex multis tamen pauca hæc accipe.

Prima, vt omnium rerum ita & huius causa mali in educatione posita est: cuius vim alicubi peruenuit Hippocrates explicat, atque miratur. Frangitur fructiferæ arboris surculus, inseritur in filuestrem truncum, crescit in magnam arborem; nec tamen fructū aut naturam mutat, propter illā primæuam sibi à teneris insitā vim. Lycurgus hoc idem, quod dicimus, suis demonstrare volens, duos educauerat catulos, iisdem parentibus natos, quorum quidem alterum gulæ assuefecerat, alterum venationi: deinde vtrunque in concionem produxit, ollam, ac leporem proposuit; secutus vterque educationem suam, leporem alter, ollam alius. Intulit ille: Videte ciues, cū ex eodem genere sint, quàm dissimiles ob educationem inter se euaserint; quantoque efficacior, quàm natura, ad res honestas, sit exercitatio. Ita in omnē partem in educatione est vis maxima. Hæc enim educatio, quæ dura & aspera est; quæ ab omni superflui sumtus aspectu etiam liberos arcebit; quæ

B 3 agellum



agellum suum eiusque culturam puero inculcabit; quæ industriam, quæ labores, quæ artes bonas, quæ militiam, inprimis autem parum & frugalem victum commendabit; hæc, inquam, & priuatim & publicè, beatos ac locupletes ciues facere solet. Contrà, mollis illa, delicata, sumptuosa, iners, quæ non sua sed aliena spectare iubet; quæ spebus (vt ita dicam) vanis incautam ætatē inflat, illique imponit; quæ altero quidem oculo bona publica, altero ecclesiastica intueri iubet; hæcque iam in cunis inculcat, tu eris Episcopus, tu Præpositus, tu Abbas, tu Cancellarius, tu Referendarius, tu hic vel ille Capitaneus, tu Rex etiam aliquando, non addito, Si D E V s volet & vixerimus; illa, inquam, educatio, pestis exitiosa est. Nam plerunque & hæc incerta non assequuntur, & sua certa amittunt: suntque Aesopico canis per similes, qui dum vmbra frusti carnis consecratur, veram carnem amisit. ignaui efficiuntur: artes rerum quærendarum negligunt. amissis autem suis, illa quibus in cunis sunt lactati, vt consequantur; quæ non faciunt fanda & nefanda? vires & valetudinem exhauriunt: in carpentis, ventos sectando, emoriuntur: hinc simoniæ, hinc rapinæ, hinc regnorū istæ nundinationes, & quæ non?

non? morique potius malunt, quàm vt domum nudi & egentes redeant. Vnde illi quandoque Asthmaticorum, Cephalicorum, Hydropicorum, Chiragricorum, Podagricorum, surdorum, claudorū, qui curias & aulas principum sequuntur greges: ex quibus si quæras, qua necessitate adacti eas cruces sufferant, nihil aliud respondere possunt, quàm id gentiles & propinquos suos velle: sua se amisisse, quò redeant non habere. Quibus miseris illud, in hoc voluendo lapide, accidere solet, quod Sisypho accidisse, in fabulis legimus; vt cum ad summum peruenerint, aliqua leui immutatione Reip. aut interregno ad ima prolabantur: sic turpes inopesque simul, iuxta poëtam, miserabile transigunt æuum. M. Generosa tamen educatione opus est, ne ciuium animi languescant & deiiciantur. Q. Generosa, sed non ambitiosa, sed non superba, & temeraria, & quæ spes pretio non emat. Facilius enim animi sumuntur, quàm ponuntur: facile se prodit, facile emergit, quem ipse D E V s ad aliquid magnum vocat. Illustis virtus diu latere non potest. M. Prosequere igitur vt coepisti reliqua.

Q. Alterum vitium est, vbi paupertatis & parsimoniæ pudere ciues incipit, quem quidem pessimum



peſſimum pudorem appellat apud Liuium Cato. Fuit ſiquidem quondam apud priſcum ſeculum, magna laus ac dignitas parſimoniæ & frugalitatis; ita, vt quem virum bonum appellare vellent, hunc frugi vocarent: nomineque frugalitatis, totam virtutem, teſte Tullio, complecterentur. Vnde illa principum familiarum à frugalitate ducta cognomina, Fabiorum, inquam, Piſonum, Lentulorum, Ciceronum, Porciorum, Vitelliorum. Magnæ laudi fuit L. Quintio Cincinnato, quatuor iugerum ager, ſtiua illa, raſtri illi, ſudor ille pulueri permixtus, veſtis ruſtica, quam vt deponeret, priuſquam dictaturam ſuſciperet, quæ tû ei, ruſtico operi intento, deferabatur, ægre Senatus populûſque R. impetrauit. Laudantur duo illi populi R. Conſules. P. Valerius Poplicola, princeps, omnium conſenſu, belli paciſque artibus ſuo tempore, & Agrippa Menenius, vir omni vita pariter plebi ac patribus charus, interpres & arbiter concordia ciuium, reductor plebis in urbem: quod adeo exiguis copiis fuerint, vt cum ſumtus funeri deeſſet, de publico ſint elati. Menenium etiam, qui illam toties accuſabat, plebs extulit, ſextantibus in capita collatis. Quid attinet prolixiore diſputatione tantorum virorû paupertate-

pertatem ſcrutari? Abundè enim patet, quid viui poſſederint, quibus mortuis lectus lugubris & roguſ defuit. Reguluſ Attiliuſ ex Africa Imperator literas ad Senatum populumque Rom. ſcripſit, villicum in agello, quem ſeptem iugerum in Papinia habebat, mortuum eſſe; occaſionemque naſtum mercenarium, amoto inde ruſtico inſtrumento, deceſſiſſe: ideoque petere, vt ſibi ſuccellor mitteretur, ne deſerto agro, deeſſet vnde vxor atque liberi alerentur. Quæ poſtquam Senatus à Conſulibus accepit, & agrum Attilii illico colendum locari, & alimenta coniugi eius ac liberis præberi, reſque quas amiſerat, redimi publice iuſſit. M. Sed quæ tandem cauſa eſt, cur, aut paupertas tanti fuerit, aut parſimoniæ pudorem peſſimum vocet Cato? Q. Magna proſectò, quam ipſemet explicat: ne ſimul ac pudere, quod non oportet cœperit, quod oportet non pudeat. Nam dum pudet, pauperè, aut parcum eſſe, quod non oportet; raptorem, uſurarium, furem, mendacem eſſe, non pudebit; cuiuſ maximè pudere oportuit. Et reuera magnarum nonnunquam rerum paupertas cauſa & origo fuit. Nam & ipſe pop. Romanuſ, imperii ſui initia paupertati accepta refert: eoque nomine ſemper



Diis immortalibus, simpulo & catino fictili, dum stetit, sacrificabat. Multas virtutes, paupertas honesta comites habet. Iusta fuit in Aristide: benigna in Phocione: strenua in Epaminonda: sapiens in Socrate: diserta in Homero. Sed hæc missa faciamus.

Tertium vitium est, vbi nō paupertatis tantum & parsimonix homines pudet: sed etiā conditionis ac ordinis sui nonnunquam. Piget aratorem esse, qui est; mercatorem suę mercaturæ poenitet; eodemq. modo alios. Inde q. euenit, vt nemo pro suo ordine & conditione viuat: nemo se suo metiatur modulo. Homo rusticanus in victu, amictu, familia, iumento, vult esse par & similis urbano: vrbanus, equiti: eques, Patritio & Senatori: Senator, Duci ac Principi: Duces & Principes, Regibus, aut si quid maius esse potest. Sic nemo intra suos cōtinet se limites. Sacerdotibus detracta byssus sua & binstinctus hyacinthus: aurū & gemmæ suæ altaribus: Regibus sua purpura, agasōnibus etiam communicata. Ita homines tanquā altaria, & similitudinem templi, sine omni decore & verecundia, incedere videas; personatos putēs, ne dicam scurras. Mihi mehercule nihil magis ridiculum videtur, quā cū regio vestitu, regis

regis familiam, Regem antecedere videam; ita vt nihil sit, quod regem à suis distinguat; sapēq. homines aberrare cōtingat, vt illos pro regibus honorent & salutent. Apud Persas quidem vel in sella regia consedisse capitale fuit. Rarus quondā apud nos vsus vini fuit, idq. statim temporibus, & inter paucos, magno fructu & emolumento vitæ longæ & sanæ mentis; nunc vulgatissimus, qui ad caulas & stabula vsque peruenit. Ita erectum est magnificum temulentix trophæum: opes exhaustæ. Scena non cohærebit, si vna persona in alterius munus & ordinem inuadat; & vita communis cohærebit? Non equidem puto.

Quartum malum, maliq. causa, aliena pro suis venditare, atq. se corniculæ more cū alienis plumis ostentare. Nam hæc ipsa purpura, & pretiosa vestis, lanæ sunt ouiu: & hoc ipsum Carmesinum ac sericum, bombicis opus est: hæ ipsæ pelles, luporum, vulpium, tigrium, pantherarum, ac reliquarum siluestrium ferarum, indumenta sunt. Vnde illud Epicteti: Nulla aliena præstantia efferaris animo. Si equus semet iactans diceret, sum pulcher, ferendum esset: tu verò cū insolenter gloriaris, te pulchrum equum habere, scito te bono equo



no equo superbire. Quid igitur est tuum? usus rerum. Nos dum beluarum ornamenta confectamur, humana amissimus. Neque verò illa argumentationis ratio placet, apud Xenophontem Socrati: Mea vestis est pretiosior, quàm tua: igitur ego sum melior quàm tu. aut illa: Generosior meus equus, quàm tuus: ego te igitur generosior. Quanto melius & verius sic: Ergo mea vestis melior est quàm tua, eodem modo de equo.

Quintum vitium est, vbi περισσὰ τοῖς ἀναγκαίοις anteferuntur, hoc est, superflua iis, quæ ad vitæ usum sunt necessaria. Vestem quis vnde compareret, non habet: de epulo tamen aut largitione aliqua cogitat. Gaudet alicubi Socrates, cùm in forum venisset, aliaque alios coëmentes videret, se tot rebus opus non habere. Multa acutè dicere solebat noster MIELECIVS, Palatinus quondam Podoliæ: hic inter cætera suos monebat, vt non omnia illa quibus opus habere viderentur, sibi compararent; sed sola ea, sine quibus esse non possent. Fit enim plerunque, vt dum in ea quæ superflua sunt, facultates profundimus; ad ea quæ nobis necessaria sunt, non sufficiant. Et superflua quidem sunt infinita: necessariorum autem est certus modus.

Sextus

Sextus gradus præcipitii est, vbi ad opinionem, non ad naturam viuitur. Venter tuus est satur, & hospites: lateri benè, tergo benè, iumento benè. Quid igitur vis? oculi non saturi: aures non plenæ, quid foris dicant, quid sentiant, quid de conuiuio opinentur, quàm magnificè sint accepti. Abi igitur, & suspende te. Atqui si ad naturam viuis, nunquam eris pauper: Si ad opinionem, nunquam eris diues, sed ne satur quidem. Refertus ieiunabis: ebrius sities. Personata, & quæ magis visum quàm gustum delectent, obsonia, laudavi nunquam. Venter enim, vt auribus, ita & oculis caret.

Septimum illud est malum, immoderatae dotes, quarum spe multi amittunt sua, familiæ sumtu exhauriuntur: omnis deinde muliebris luxus. Creuerant satis ante secundum bellum Punicum populi Ro: opes: in Hispaniam vsque protulerat vires suas; Scipionem, qui tum ibi bella gerebat, charissimum habuit: cùm tamen is, elocandæ filiæ virginis adultæ causa, se ex Hispania reuocari à Senatu petiisset, Senatusq. patris sibi partes desumisset, cōsilio vxoris ac propinquorum Scipionis, dote constituta, summā eius quadraginta millia æris sola, hoc est, quadringentos ferè taleros, C 3 ex æra-



ex ærario erogavit, ac puellâ nuptui dedit. Tatia Cæsonis filia, maximam dotem ad virum decem millia æris attulerat: hoc est, centû nostros taleros. & Alegalia, quia cû quingentis millibus æris, hoc est, quinq. millibus huiusmodi talerorû, mariti domum intrauit, dotata cognomen inuenerat. Nunc decem millia dotis priuato homini parum est, quæ quondam Reginarum dos fuerat. Nota est illa lex Oppiana, pro qua mirum in modum certat apud Liuium Cato; qui in medio ardore Punici belli legem tulerat, ne qua mulier plus semiuncia auri haberet, neuê vestimento versicolori vteretur. Massiliensium quoque frugalitatem Strabo celebrat, quod apud eos mulierum dos maxima centum aureos nō excederet, vestimenta quinque aureos. Genuensis mulier, si quid præter sumtuariam legem fecerit, hoc est, gemma aliqua pretiosa, auro aut serico vsa fuerit, quod apud illos in communi opere est; maritus centenis aureis mulètur, quos ipse ex dote detrahit: hacque ratione omnis mundities & ornatus apud eas conseruatur, sumtu & luxu excluso. At nos vix non ex Aethiopa vsque.

Octaua est causa mali, externus miles, vel domesticus sumtuosus. Habent siquidem hoc vitium ex-

um externæ copiæ, quod primo domesticorum animos eneruant, ac negligentiores faciunt: deinde ditissimam etiam Rempub. exhauriunt. Populus Romanus vix post trecentos annos suo militi stipendia numerauit; externo, præter socios, an aliquando fuerit vsus, non ita facillè exemplum occurrit, nisi fortè insanis illis & fatalibus ciuilibus bellis, posterioribusque temporibus. Nostri item homines, nobis primûm adolescentibus, alieno milite vti ceperunt, vel propter disciplinam remissam, vel propter externos reges. Dimidia virtus ciuium perit, accersito externo milite. Sed ne illud quidem minus malum, vbi domestico militi, nunquam satis fit, non stipendio, non donatiuo, non præda, non rapina: sumtus maximi, plusquàm pacis, deliciæ superfluxæ, quæ militem effœminatum reddere, ærarium verò exhaurire solent. Scipio, vbi Numan-tiam, à multis imperatoribus nequicquam oppugnatam, obsessurus in castra venisset, multamque & licentiam, & superstitionem, & delicias deprehendisset; nigro circumdatus sago circuiuit, lugere se exercitus turpitudinem dicēs, vatesq. omnes, & ariolos, & lixas, & lenones statim eiecit, ac vasa omnia, præter ollam & veruculum, & calicem



licem fictilem, amandari iussit: argenteum quoque poculum, non maius duabus libris habere volentibus, ægrè permisit; lauari autem prohibuit: edixit quoque, ut stantes crudum pranderent obsonium, cœnarent autem discumbentes, panem vel pultem simpliciter, & carnem tostam aut elixam. Indeque Numantini, cum toties victricem suam fortunam mutatam mirarentur, quidam respondisse fertur: Pecora Romanorum etiam nunc eadem esse, sed mutatum pastorem.

Nonum vitium illud est, ex quo hæc mala nascuntur; quando exotica quærentur omnia, domesticum & patrium placet nihil: non victus, non vestis, non seruus, non ensis, non equus. Mercator extremos oportet ut currat ad Indos, dum tergo & palato ciuium satis faciat. Plura ex pharmacopoliis quam ex macello in mensis apponuntur; interdum ea, quæ neque conuiuia neque conuiuator nominare possit, sæpiusque ad Plinium & Dioscoridem, Athenæum item recurrere oportet; antequam cœna intelligatur: quam ad rem docto etiam interprete opus est. Equi ex Arabia usque adducti, alimenta non norunt: noua rerum satiatione opus est, quam tellus, ut ignotam, non accipit. Neque pudet aliena pro suis venditare, idque

idque sine omni iudicio & delectu plerumque. Nam quæ apud eas nationes seruorum aliquando sunt alimenta; apud istos, eo solum nomine, quod externa sunt, pro secundis mensis bellariisque apponuntur, & habentur. Neque item mihi placet illud quorundam Emblema: Pingi quasdam gentes nudas, cum rudi panno, ex quo quiuis vestitus esse possit. Quod etsi illud significare posset, quemuis Aristippo colorem conuenire, quod & ipsum non valde laudabile est; tamen & nudum pingi paupertatis signum est; & indigestum pannum gerere, inconstantia & seruitutis. Laudandus est igitur populus Romanus, quod externis rebus in sola scena usus sit: in cæteris, domesticis contentus.

Decimum illud est, & magis exitiosum, ubi non tantum res, sed & luxus ac profusiones peregrinarum gentium accersuntur: idque non vnus tantum & alterius, sed omnium simul; idque sine modo, nullo aut publico aut priuato commodo, atque aliquid etiam de suo additur. Ad nos quidem, quid Italicum, quid Gallicum apportatum non est? Germanicum, & Britannicum, Vngaricum, & Moldauicum, eodem modo, & quod dolendum est, fortè & Byzantina non pauca. Iam



stant & ostentant alię gentes & nationes aurum, argentum, ebur, lectos, vestes, totamque supellectilem pretiosam: mensas & epulas alię: aleam, Bacchum alię: amores sumptuosos, vnguenta, & musicam nonnullę: multę umbratiles pugnas, & certamina scenica; Nos simul hęc omnia. Neq. sufficebat alienū luxum ad nos transtulisse, nisi aliquem nostrum addidissemus. Est autem ille, qui in alendis non necessariis corporibus situs est: quem expressit illud vetus prouerbi-  
um *τὸ πλεονέκτημα τῆς ἐξουσίας*. Computat Herodotus, in vnus hominis superflui annum victum tantum infumi, ac si trecentos, & quinquaginta, & aliquot homines vno die alas. Tot enim dies anni sunt. Fabricium quidem Licinium continentię suę beneficio, sine pecunia perdiuitem fuisse, ac sine vsu familię abundē commendatum, testantur veteres. Cato verò superior, tribus solis seruis comitatus Hispaniam rexit, qui, vt ipse scribit, pellibus hoedinis pro stragulis vti solebat, eodem cibo & vino, quo nautę, contentus. Posterior autem Cato, non plures quàm duodecim seruos, delicata iam & luxu soluta Roma, totis illis bellis ciuilibus circumduxit. seruos dico, non illos dominorum dominos. Et ante hos Manius Curius,  
qui ter

qui ter triumphum vna porta egit, duos solos in castris calones habuit. Ita ille vir, de Sabinis, deque Samnitibus, deque Pyrrho triumphator, pauciores seruos habuit, quàm triumphos. Nos non familiam, sed cohortes in media pace & quiete ducimus, & plerunque pretiosius vestitos, quàm nos ipsos. Siue ad Philosophum, siue (vt leuissimè dicam) ad vxorem veniendum sit, magna comitante caterua progredimur. Quę res, etsi vbique odiosa, tamen in Repub. libera minus ferenda est. Nam greges isti, seruitutis cuiusdam insigne sunt, quasi aut ipse metuas, aut metui velis. Quid enim libertati magis repugnat, quàm alienum armatum sufferre, illi de via decedere, primum locum dare, fulmina bombardica, sine tonitru metuere? Potentem, inquit, aduersarium habeo. Atqui hęc vox non est Reipub. liberę, pugnat enim potentia cum libertate. Quàm tristis est Tullii querela, se inter armatos sententiam dicere? Quales comitatus tum primùm Romani habere coeperunt, vbi perierunt. Nam & fasces, & secures magistratui præferri, aliquando subtristius est; quid priuato homini? Rumpatur generosum pectus oportet, vbi cernit, quod magistratui non licet, cuius licere. Qui  
D 2 liber



liber est, solus, vel cum paucis incedit, (quod sæpè diximus) timet neminem. Nam de iumentis quid dicam? Mitto illorum multitudinem: vnā mulierculam, cum qua vel robustior musca auolaret, trinis bigis vehimus, in quibus sex egregii milites pro patria fortiter pugnare possent. Apud populum Romanum aliquando lege cautum fuit, ne mulieres iuncto vehiculo, in vrbe oppidoūe, aut propius mille passus, nisi sacrorum causa, uerherentur. Pretium quidem equorum intolerabile est. Quid enim magis esse potest hominis stulti ac temerarii, sibi quæ à Deo datis bonis abutentis; quàm iumentum, quod eodem die extinguere potest, mille aureis comparare? Quod si eam Rempu. diu stare non posse, dicebat Cato, in qua piscis sit carior boue: quid de ea dices, ubi caput equi pluris censetur, quàm equitis? Hoc certè est comparari iumentis insipientibus.

Vndecimum malum est, si non ex eo, quod habent, sed ex eo quod aliquando habituri sunt, ciues viuere assuecant. Hoc autem multis modis fit: Primùm, si multorū qui sequuntur annorum, priusquàm oriantur fructus absument: cui vitio egregiè inseruire solet illa insidiosa, tam auarorū quàm prodigorum hirudo & administra, quam

Ita li

Itali Arendam vocant: deinde, ubi venturæ hæreditates, priusquàm emergant, profunduntur: postea speratæ dotes: vltimò futuræ dignitatum & sacerdotiorum spes. & ita speratis rebus viuunt. Homo parcus & frugalis ex conditis uiuit: præsentibus gaudet, ac fortuitis temporibus reseruat: futura expectat: colligit tanquam semper victurus; dispensat tanquam cras moriturus.

Duodecimum malum est illud, dum ciues non ex rebus ac facultatibus, sed pro rebus & fortunis suis viuunt: hoc est, non amplius fructibus & prouentibus suis contenti sunt; sed ad extremum res ipsas, & fortunas, vnā cum ossibus & cineribus maiorum suorum vendunt, vel oppignorant, ne quid aut suæ, aut maiorum suorum memoriæ ad posteritatem extet. Desperatorum ac deploratorum hoc hominum est. Nam ut illi, qui fame enecantur, vltimò consumtis omnibus carnes suas, tanquam in rabiem versi, absument; ita isti consumtis fructibus, fundos ipsos deuorant. Infauusta proles, quæ, quod ipsi ad vsum tantum concreditum est, perpetuò abligurit: impia in maiores, crudelis in posteros, exitiosa in seipsam. Dignissimi, è quorum dextera, ab agnatis & cognatis annulus cum signis, & imaginibus maio-

D 3

rum



rum suorum detrahatur. Quod quondam Scipioni, superioris Africani filio ignauo propinquos fecisse, qui ei annulum, in quo caput Africani sculptum erat, è manu detraxerunt, legimus. Indignum hominem inertem nobilis familia iudicauit, qui vultum patris sui in prodiga & timida manu haberet. Nunquam hunc veneranda illa vetustas admisisset, ad sua charistia: quorum illa inuitatio:

*Innocui veniant: procul hinc procul impius esto  
Frater.*

Tredecimum, vbi ciues rebus suis consumtis, aliena consecretantur. Quid rides? M. Quasi verò non videas? In promptu causa est. video iam rem ad extrema deduci. Perge igitur.

QVARE. Quartadecima causa, si iis morbis nullum remedium adhibeatur: si ægri tam graui morbo laborantes non curentur; sed suæ voluntati satisfacere permittantur. Tritum est illud populi Romani prouerbum: Ad agnatos & cognatos referri, quod morem & disciplinam gentis illius designabat. Vbi enim primò quis suis fortunis abuti coepit, vbi profusiùs illa dispensare; hic cum suis facultatibus in curam agnatorum & cognatorum à magistratu tradebatur, dum vitæ suæ  
ratio-

rationem inueniret. Quod si his carebat, publicè illi tutor & curator adhibebatur, qui tantisper eum resque eius curaret, dum ad se rediret. Notæ sunt hac de re Imperatorum leges: verbis multis opus non est. Carent his remediis ætas, & tempora nostra.

Vltimum vitium, vbi authores, adiutores, & perfectores eius profusionis, non modò non puniuntur, sed etiam ditescunt, legitimorumque dominorum possessiones, ad non legitimòs transferunt. Multæ hoc in loco administrorum sunt species, dum alii noua genera voluptatum ac deliciarum, alii monstrorum & vanitatum, alii dapum & temulentia comminiscuntur: sed nulli peiores, quàm illi, qui præsentem pecuniâ illis quærunt, aut ipsi suppeditant, modò & ipsi ditescant, & lautis patrimoniis ac veteribus facultatibus alios exuant. Idque nonnunquam ipsi cognati & agnati faciunt, genus hominum cruce dignissimum. Quid enim est insano gladiu dare, aut furentem soluere? Huc referuntur illæ exitiosæ arendæ: vsuræ intolerabiles: miserorum iuuenum tormenta & cruces: monstrosæ obligationes. Vnde iurium inuersiones: binæ & ternæ eiusdem rei venditiones. Quæ omnia, quo tu meliore nomine nisi



ne, nisi quandam ἀλλοφροσύνην appelles, ubi homo hominem deuorat, nec artem aliam nouit, quàm alios absorbere; eorumque fortunis abuti.

Atque hæc quidem vitia sunt, quibus Resp. tam priuatim quàm publicè exhauriuntur, in grauemque & periculofam phtisim incidunt. Nam & in tabe hoc idem euenit, vt primùm membra quædam magis præcipua arefcant, ac vlcere conficiantur, postea reliquum corpus consumatur; indeque phtisin generari medici docent. Ob quæ eadem vitia, nostram Rempub. eò quò quereris deductam puto, nisi tu fortè aliquid aliud sentias. M. Ego verò non modò nihil aliud sentio, sed illud etiam addo, non hanc solùm Rempub. quæ ne tu quidem ditissimam dicis, sed locupletissimum etiam regnum his talibus vitiis exhauriri oportere: longèque aliud sentio nunc, quàm nuper sensi, Rempub. hanc scilicet inopem esse, cum satis diues esse videatur, quòd hætenus non sit tantis sumtibus exhausta, contraque tot ac tantos hostes se quotidie tueatur, quodue hac ipsa phtisi iam olim consumpta non sit. Quibus enim aliis artibus res periit Romana, quàm iis largitionum ac immensarum profusionum, & quod alieno ære pressi quidam, Repub. salua, se saluos esse non

non posse; vt ipse testatur Cæsar, existimarunt? Rectè nosti, ob quam causam Curio tribunus pleb. & alii Cæsarem secuti sint. Aurea illa apud Liuium est Catonis oratio: Sæpenumero, inquit, audistis, diuersis duobus vitiis auaritia & luxuria *Quibus vitiis* ciuitatem laborare, quæ pestes omnia magna imperia euerterunt. *hic enarra h*

Quid igitur restat, vt agamus? M. Res ipsa indicat. Quid enim aliud sequitur, quàm vt ubi morbos exposueris, remedia eorum afferas? Q. Atqui inueteratus morbus est, curari difficilè potest. M. Tentandum tamen aliquid est; morbus hic inueteratus est, non tamen desperatus. Q. Ego quidem apud nos, nullum remedium efficacius aliud esse puto, in tam laxo & latè fuso populo, quàm vt ipse spontè cognoscat, quàm stultè, quàm ineptè, quàm ridiculè hæc faciat: deinde quantum aut infamiæ, aut dedecoris, aut incommodorum, aut exitii ea res tam priuatim quàm publicè ferat; vt cum pro laude infamiam, pro commendatione ignominiã, pro autoritate risum, se consequi cognouerit, à re vanissima aliquando abstineat, eamque oderit perpetuò. M. Hoc igitur, obsecro, si potes, & quantum potes ex-



res explica. Q. Res quidem per se suaque sponte clara est: tamen si ita placet, quid ea profusio mali, tam priuatim, quam publicè, ut diximus, afferat, paucis expendamus. Publica quidem bona, si distrahantur, quantum in ea re insit incommodi, non tam Plato aut Aristoteles, aut aliquis ex veteribus, quam Deus ipse docuit. Cuius lex apud Ezechielem illa est: Si dederit princeps donum alicui de filiis suis; hæreditas illius, filiorum suorum erit, possidebunt eam hæreditariè. Si autem dederit legatum de hæreditate sua, vni seruorum suorum; erit illius usque ad annum remissionis, & reuertetur ad principem: hæreditas autem eius, filiis eius erit, & non accipiet princeps de hæreditate populi per violentiam, & de possessione eorum, sed de possessione sua hæreditatem filiis suis dabit; ut non dispergatur populus meus, vnusquisque à possessione sua. Dispensationem regionum bonorum, quæ tum hereditaria fuerunt, lex ista docet, cuius sensus hic est: Si rex aliquot habuerit filios, & ex his vni dederit donum; ferent æquo animo alii: donum erit eius, & posteritatis suæ. Si autem dederit alicui, vel ex militibus, vel ex familiaribus suis; fruatur liberalitate regis, sed ad annum quinquagesimum,

Ezech:  
46.

num, qui Iubileus vocabatur, tantum: quo anno, alienata, ex vnaquaque tribu & familia, ad dominos suos redire oportebat; ne tribus & familiæ exhaurirentur, aut inter sese cõfunderentur. Et legis quidem sensus hic est. Causa autem legis illa, ut non accipiat princeps de hæreditate populi per violentiam, & de possessione eorum: hoc est: non exhauriat rex facultates suas; ne vbi defuerint, alienas sequi opus habeat. Quod quidem multis modis (durum enim onus necessitas est regni, eiusque sumtus) esse poterit: vel per violentiam, qui solus modus hîc ponitur, quomodo Achab inuasit vineam iusti Naboth: vel per necessitudines & affinitates, cum externis regibus, externasque mercaturas; quod de Iosaphat legimus: vel per auaras œconomias: vel per iuris prodicionem, causarumque venditionem: vel per submissarios homines, priuatorum hominum fortunis insidiantes, ac ventis aurum captantes; quarum rerum sunt plura, quam velimus exempla. adde his legum, religionumque, ac priuilegiorum inuersiones: portoria atque vectigalia: frequentes census & tributa: calumnias, ac desertas & caducas hæreditates. Quod si aliquid horum rex non faciet, tum illud, quod omnium deterri-



mum est, consequi solet; vt, vbi omnia ex multitudinis manu spectare coeperit, pro rege ac magistratu assentator populi (quod de Pericle legimus) factus, omnia libidini & cupiditati eorum concedat: cum illisq; nunc de religione, nunc de rebus sacris, nunc de licentia, nunc de magistratibus ac publicis honoribus licitetur; modò habeat vnde se, vitamq; suam tueri possit: qua peste nulla nocentior, nulla exitiosior rebus pub. esse potest. Satisné idoneæ & sufficientes istæ causæ ad perdendam validissimam rempub. tibi videntur? M. Plus quàm vellem efficaces sunt. Illud tamen metuo, ne pro frugali tenacem regem facias: magnificentia enim regum est propria; & ne illi parti iusticiæ, quam philosophi distributiuam vocant, iniuriam facias. Q. Ne metuas: quantò plura habebit, tantò maiora & inter plures largiri poterit: de ipsis possessionibus & facultatibus agimus, non de fructibus facultatum. Illas teneat, hos largiatur: quanquam & in hoc genere quid excellens cuiusvis virtus & merita exposcant, videndum erit. M. Quoniam igitur de illis malis & incommodis, quæ rempu. sequuntur, dixisti, dic de his quæ priuatos sequi solent. Q. Infinita sunt, sed ex his pauca feligamus.

gamus. Primùm igitur illud est, & quod vel solum ad deterrendos istos sufficere deberet; quòd id, quod volunt, non consequuntur: imò verò contraria omnia. Quatuor autem sunt præcipua, quæ sibi in hac sua profusione proponunt, sibiq; comparare volunt, à quibus tamen longissimè absunt. Primùm, vt sibi hac ratione, quandam authoritatem & admirationem concilient: maiores ac augustiores videantur: fidemq; sibi faciant. A quo quantum absint, illa in omnibus linguis infamia nomina, quibus hæc ingenia notari solent, abundè testari possunt. Græci ἀσώτους, hoc est, homines perditos, ἀκολάστους, id est, effrenes, & eos qui castigari nequeunt, vocant. Latini perditos, profusos, profligatos, desperatos, dissolutos, ne deteriora dicam nebulones, lurcones, ventres, manducones, bibones, heluones, decoctores, euerfores, conturbatores macellorum, voragines patrimoniorum, & aliis infamibus nominibus appellant. Miserat quondam Dionysius Lysandri filia, vestem nimis sumtuosam; qua ne vteretur prohibuit pater, adiuncta illa causa: Turpè est, inquit, in luxuria esse conspicuum. Indequeuenit, vt neque testamentum, neque liberos, neque magistratum, neque depositum huic generi

E 3 homi-



hominum, quisquam credere velit; sed fabula & exemplum ciuitati ac scenæ sint. Non his neque talibus artibus, veteres sibi honorem & dignitatem comparabant. non Metellus: cuius administratæ prouinciæ tabulas, pop. Rom. non aspexit: non in tabulis, sed in vita Q. Metelli argumenta sincerè administratæ prouinciæ, legenda sibi reputans. non superior Africanus: ad cuius dextram osculandâ piratæ inter se conspirârunt: quos cùm ille fugisset, dixisse feruntur: Non vitæ eius hostes, sed virtutis admiratores venisse, conspectum & congressum tanti viri, quasi cæleste aliquod beneficium expetentes. non Cato, magnus ille parsimonix & frugalitatis assertor: quē, cùm in carcerem duceretur, vniuersus Senatus sequi non dubitauit: quo eodem præsentē, pop. Rom. nescio quid impudicum in theatro aspicere erubuit: confessus, plus se maiestati illius tribuere, quàm sibi ipsis vniuersis. Quibus conuiuuiis, quibus opibus, imperiis, triumphis, hoc datum est; quod huic viro exigui patrimonii, vna paterni generis imagine claro, minimèque blandæ frontis tributum est? Deinde illud affectant, vt liberales, munifici, ac si fieri possit magnifici videantur. Consequuntur autem illa, vt à Latinis qui-

nis quidem homines nihili, vappæ, à suis autem golotæ & odardi appellentur. Nam veræ liberalitatis ac magnificentix illæ leges sunt; vt det quibus oportet, & quod oportet, & vnde oportet, & quantum oportet, & quando oportet. Det, inquam, non accipiat: non modò vnde non oportet, sed ne vnde oportet quidem aliquando; det autem pro facultatibus. Liberalem enim actionem, non in multitudine eorum quæ dantur, sed in habitu dantis consistere dicebat Aristoteles; vt det vltro ac libens, cum voluptate etiam, ac sine omni dolore. Liberalitatis enim duos illos fontes esse nouimus, verum iudicium, & honestam beneuolentiam. Quarum legum cùm isti nullam feruent; ideò liberales nullo modo nec dici, nec esse possunt. Et vt liberalitatis hæ leges sunt; ita munera illa, quæ Aristoteles, Seneca, & alii magni enumerant: templa diuûm ac heroum extruere: donaria item offerre ac suspendere: publica ædificia erigere: quæque ad rempub. liberaliter faciunt, captos redimere: amicorum filias elocare: reipub. pace & bello opem ferre: monumenta familiæ excitare: obæratos liberare: afflictis & egentibus opitulari: gymnasia publica, tam rei militaris, quàm bonarum literarum, consti-



constituere: magna ingenia domi ac foris alere: legatos magnificè accipere: artes sumtuosas subleuare. Isti autem rebus amissis, ne fornacem quidem collapsam erigere possunt, aut fores effractas restituere. Hos igitur tu, liberales, munificos, magnificos, appellabis; qui non modò liberales non sunt, sed nullis minus licet, etiamsi velint, liberales esse, quàm illis? Vbi enim in res non necessarias & superfluas omnia profuderint; in liberalitatem quid conferant, reliquum nihil habent, nihilque minus facere possunt, quàm quod vellent. Nam frugi, tenaciq. homini, quandocunq; volet, liberalem esse licet; prodigo non item. Amicitias deinde hoc genere beneficiorum paraturos se putant, certas & fidas clientelas, fortes propugnatores, parasitos nimirum, assentatores, comedones, barathra & voragines. Atqui euenit nonnunquam, vt nullos mordaciores obtrectatores habeant, vbi ipsos deuorârint, & ad alios dominos se transtulerint, apud quos istorum reprehensione cibum emunt. Parua est obligatio mensæ: simul cum cibo & potu deperit: dapibusque consumtis frigescit. Ideò deberi sibi plerunque putant aliqui, quod earum ineptiarum spectatores fuerint: maledicunt

cunt quandoque alii, quòd nonnunquam plus, quàm par est comederint aut biberint, aliquando tempora sua necessaria & occasiones, sibi effluxisse queruntur. His scilicet talibus amicitiaæ foederibus, illa ipsa notissima amicorū paria conglutinata fuerant: Orestis inquam & Piladis: Thesei & Pirrithoi: Damonis & Pythiæ: & vt hæc fabulosa mittam, apud Hebræos, Dauidis & Ionathæ, apud Romanos Lælii & Scipionis. Lælius quidem de sua cum Scipione coniunctione eiusq. causis, ita: Quid enim Africanus indigebat mei? Minimè hercule: at ne ego quidem illius. Sed ego admiratione quadam virtutis eius; ille vicissim opinione fortasse nonnulla, quā de meis moribus habebat, me dilexit. Auxit beneuolentiam consuetudo. Sed quanquam vtilitates multæ & magnæ consecutæ sunt, non sunt tamen ab earum spe, causæ diligendi profectæ. Prata, & arua, & pecudū greges diliguntur isto modo, quòd fructus ex eis capiuntur; hominum charitas & amicitia gratuita est. Non mensis igitur comparantur amici, aut profusione; sed virtute, prudē-  
*Amicitia*  
*consuetudo*  
 tia, humanitate, obsequio, studio & operâ, communibus præsidiis ac clientelis quæruntur: nam hæc & diutius durant, & magis prosunt. Nunquam  
 F. quam



quam enim illæ ineptæ mensæ, infaniq. apparatus, tantum amicorum parare possunt, quantum inimicitiarum pariunt iniuriæ, rapinæ, pecuniæ retentæ, eorum apud quos isti quærunt. Nam in conuiuio si quid est, illud est, vt sit sanum, benè coctum, bono sermone conditum; cætera pompæ potius & ostentationis, quæ omnibus inuisa & molesta est, quàm vsus sunt humani. Caput autem totius munificentia, illud est: Melius & facilius esse, non accipere, quàm dare. Et illud: Videndū esse, vt ea liberalitate vtamur, quæ profit amicis, noceat nemini. Pecuniarum enim translatio à iustis dominis ad alienos, non debet liberalis videri. Nihil enim liberale, quod non sit idem iustum. Quis sumtus, ac profusio est tanta, quæ cum illa humanitate ac moderatione Scipionis, conferri possit? ad quem, quartum & vigesimum annum agentem, cum inter reliquam prædam, eximiæ formæ virgo ætatis adultæ adducta fuisset, illeque & iuuenis, & coelebs, & victor comperisset, illam illustri inter Celtiberos loco natam, nobilissimoque eius gentis Indibili desponsam; accersitis parentibus & sponso, inuiolatam tradidit; aurum quoque, quod pro redemptione puellæ, allatum erat, summæ dotis adiecit.

Qua

Qua continentia & munificentia Indibilis obligatus, Celtiberorum animos Romanis conciliando, meritis eius debitam gratiam retulit. Aut cum illa Fabii vera & sincera liberalitate, quæ munificentiâ comparari potest? cui cum captiuos ab Annibale, interposita pactione nummorū, recepisset, iique à Senatu non præstarentur; misso in urbem filio, fundum quem vnicum possidebat, vendidit, eiusque pretium Annibali protinus numerauit. Aut cum illa itidem in hostem pietate, qui Annonis ducis Carthagensium, Olbia oppido capto, in quo ille fortissimè dimicans occiderat, corpus è tabernaculo suo, amplo funere extulit. Hæc animos, hæc corda eripiunt.

Diuites ad extremum apparere volunt, quod quidem minimè ex omnibus consequuntur. Vt enim hominibus locupletibus, peierantibus etiam, nemo credite eos egere, aut diuites non esse; ita istis, etsi millies iurent, se abundare atque diuites esse, quos quoduis prandium egentiores facit, nemo credit, cum præsertim ipsimet creditores, mensæ illorum assideant. Itaque non modò id, quod volunt, non consequuntur, sed insuper, vt diximus, miseri & infames euadunt. Quæ cum ita sint, quis sapiens aut cordatus eam mercatu-

F 2

ram



ram exercere velit, quam nullum quidem lucrum, iacturæ autem & naufragia perpetua sequantur? Et magna quidem ista sunt, hominī hæc rectè apud se expendenti; sed illa longè maiora, quòd hac sola inani, fucata, falsaque laude, vel infamia potius, vt diximus, ingenia magna, & ad res sublimes nata, contenta, reliqua ornamenta omnia, contemnunt: ornamenta, inquam, militiæ, fori, curiæ, doctrinæ, ad quæ consequenda nati, suscepti, & instituti, erant: coci, cætarii, factores, pro ciuibus, pro patriciis facti, quorum palatum subtilius sapit quàm cor. At quantò illustriora & maiora illa præ istis? Quis igitur non iure talem deploret conditionem? aut quæ maior prodigalitas hac ipsa, non tam fortunarum quàm ingeniorum? Neque tamen hîc finem inuenit malum. Nam non modò nulla ornamenta his artibus acquirunt, verùm etiam, quæ vel à natura, vel ab industria consecuti fuerunt, penitus perdunt ac extinguunt: corporis primū bona, dum per intemperantiam, & creditorum molestias, nunc arthretici, nunc ischiadici, nunc paralytici, nunc infani & amentes euadunt, trunci & stipites, imò fuci inutiles: qui eorum bona, qui aliquid opis reipu. afferre possent, profligata deuorant

uorant impudentia: quibus anima pro sale tantum data esse videtur: & qui ab onere corporis, tanquam equites ab equo in luto prelsi, sani & vigentes, inutiles iacent. Animi deinde eodem modo bona amittunt: mitto illa minora, sensuum perspicaciam, memoriam, acumen, solertiam, literas, si quas consecuti sunt; hæc maiora accipio, pietatem erga Deum, in patriam, maiores, posteritatem suam; quam tanquam stupidi homines ne aspiciunt quidem, & cui nihil suum reddunt: prudentiam, item animi magnitudinem, temperantiam, iustitiam, fidem, sinceritatem, veritatem; nam mendacissimi sint oportet. Indeque duo apud Persas censebantur esse turpissima, vt docet Herodotus, τὸ ψεύσασθαι καὶ τὸ ὀφείλαρ χρεὶς: hoc est, mentiri, & debere: vt sit posterius hoc prioris illius causa; quòd impossibile esse videatur, eum non mentiri, qui plurima debet. Quibus ornamentis amissis, quid restet hominis, ego non video. Consequuntur deinceps eosdem illa mala, insueta paupertas, dura mendicitas, improba seruitus (seruiendum enim est, plerunque illis, qui tibi aliquando seruebant) inhumanus creditor, obsessæ fores, matutina & vespertina custodia, importuni serui, graue iugum, & tabes crescentis in



tis in dies foenoris, infamiæ, in ius quotidianæ vocationes, per tribunalia cursitationes: hinc toedium; inde, vbi leuamen mali quæritur, desperatio, quam sequuntur fraudes, doli, technæ, infidiæ, imposturæ, mille artes, fanda & nefanda sacrilegia, templorum direptiones, rapinæ, peculatus, viarum obsidiones, tumultus, seditiones, cum hostibus clandestina consilia, proditiones, nundinationes, transfugia. Docuerunt hæc abundè, tria, quasi vno tēpore, apud nos interregna. Quæ causa malorū fuerit, quò res deducta fuisset, nisi omnipotentis dextera adfuisset, vidimus omnes. Concussimus orbem nostra profusione: & quæ inde nata est, indigētia. Sed hæc missa faciamus. Consequuntur deinde illa iudicia, quæstiones, proscriptiones, exilia, vincula, infames mortes, diminutiones capitum, tam singulorum quàm familiarum, ad extremum illa sacræ scripturæ: Fiunt filii eorum orphani, vxores eorum viduæ: nutantes transferuntur filii eorum, & mendicant, & eiiciuntur de habitationibus suis: foenerator scrutatur omnem substantiam eorū, & diripiunt alieni labores eorū: non est illis adiutor, nec qui misereatur pupillis eorum. Ferunt Augustum relata ad se magnitudine æris alieni, quā quidam  
eques

eques Romanus dum vixit, excedentem ducen-  
ties HS celauerat, culcitram eius cubicularem  
in auctione emi sibi iussisse; et præceptum mi-  
rantibus, hanc rationem reddidisse: habendā esse  
ad somnum culcitram, in qua ille, cū tantum  
deberet, dormire potuisset. Satisne idoneæ tibi  
videntur istæ causæ, quæ ab hoc infano morbo  
hominem sanum auocare possint, modumq. huic  
libidini statuere? M. Satis equidem. Q. Hæc  
igitur illa causa est, cur in omnibus rectè ordina-  
tis Rebusp. huic vitio tantum occurrebatur sem-  
per, quo nihil exitiosius aut publicè aut priuatim  
esse potest. Notum est studium & diligentia in  
hoc genere Laconum, apud quos vna veste sim-  
plici annua ciuem vestiri oportuit: ex quibus nul-  
li focus priuatus, non mensa fuit: omnes publi-  
co victu in syfitiis contenti, siue illi Reges, siue se-  
natores, siue quicunq. alii fuere: quibus balnea  
nulla, vnguenta nulla, obsonia propemodum, præ-  
ter ius atrum & carnis aliquid, nulla: theatra, co-  
mœdias, & tragœdias non spectabant; vt neque  
seriò neq. ioco audirent quid impudicum, aut le-  
gibus aduersum: sed ne cum peregrinis quidem  
consuetudo multa; exoticum & peregrinum pla-  
nè nihil: dotes nullæ; cuius rei præclaram causā  
primus



primus eorum legislator Lycurgus dedit, ut neque propter egestatem aliquæ relinquantur innuptæ, neque propter opulentiam colantur: priuatæ ædes ex ligno non secto: tecta sine ferreo clauo: pro lectis & stratis ætate quidem iuuenes stibadibus utebantur, quas è summatibus arundinum componebant: hyeme autem lycophonas stibadibus admiscebant, quod aliquid caloris habere videbantur: funerum cura nulla, præter puniceam vestem, & oliuæ folia, in quibus omnia omnium cadauera reponerentur: inscriptiones monumentorum nullæ, nisi quis in bello cecidisset. Et ideo auri quidem ingredientis, ut inquit Plato, vestigia multa, egredientis nulla: et ideo septingentis ferè annis legibus Solonis usi, integri manserunt: ideoque ultimi omnium Græcorum seruierunt, idque Romanis tantum; si modò iustum & legitimum imperium seruitus dici debeat. Qui iidem Romani, quantum huic malo aduersati sint, & restiterint; tot leges eadem de re apud eos latæ testantur. Fannia, inquam, Licinia, Aemilia, Antia, Iulia, Syllana: quæ non tantum suppellectilis, aut vestis, aut dotis, aut nuptiarum, aut iumentorum alendorum, aut conuiuiorum modum ponebant; sed coenarum etiam quotidianarum sumtus as-

tus assignabant populo illi, qui princeps erat populorum. Quibus quam diu obtemperatum est, tam diu illis omnia paruerunt: à quibus cum recessum est; non magis hostili ferro & igni, quam usuris, & ære alieno absumti conflagraverunt. In Catone illud miratur Plutarchus, quod iam senex post Consulatum & triumphum adeptum, nulla unquam veste usus sit, quæ centum denariorum, hoc est decem talerorum precium excederet. Iam & in obsonium ipse Cato in diem triginta asses insumebat, hoc est usu nostro Polonico, triginta solidos: Habent enim leges sumptuariæ commoditatem quandam singularem, quam egregie explicat apud Liuium Cato: Quia quod aliqui habere non possunt; habituri, si per leges liceret, fuisse videntur. Cornelius Rufinus, duobus consulatibus & dictatura functus, quod decem pondo vasa argentea comparasset, perinde ac malo exemplo luxuriosus, in ordine Senatorum retentus non est. M. autem Antonius, L. Flaccus Censores, Duronium senatu mouerunt, quod legem de coercendis conuiuiorum sumptibus latam, tribus plebis abrogauerat. Quid nunc Venetiis, quid Genuæ fiat, vides: quanta parsimonia & quæ opes? M. Habesne aliqua alia remedia? Q. Non desunt.



essent quàm plurima, sed non pro hoc nostro infirmo: possunt tamen quædam addi. Primum, si ipsi reges, magistratus, senatus, eius parsimonie & frugalitatis, duces & authores esse voluerint. Vnde dicebat Plato, Frugalitatis exemplum, maximum esse reipub. vectigal. Ferunt Agesilaum nihil vnquam præcepisse, quod ipse prius non fecerit. Quod quidem in hoc frugalitatis genere apud nos Stephanus ille magnus, & cuius virtuti nondum par elogium inuenimus, magno ciuium profectu faciebat, & proficiebat aliquid. Sed non ita facile inueteratum malum curari & extirpari poterat. Regis ad exemplum, ait ille, totus componitur orbis. Nam crede mihi, tota res parue æmulationis est; & vt extirpetur, duce solo opus habet. Q. Catulum, Campanam, imitatum, luxuriam, primum spectantium confessum, velorum umbraculis texisse legimus: & Pompeium ante omnes, aquæ per semitas decursu, æstium minuisse feruorem. Claudium Pulchrum scenam varietate colorum adumbrasse: totam argento C. Antonium: auro Petreium: ebore Q. Catulum, prætexuisse. Versatilem fecerunt, Lucius & Cinna locum, quem argentatis choragiis, P. Lentulus Spinter adornauit &c. Vides, in vna profusionis

fusionis vanitate, quanti sint profectus; idque in deterius semper, ex stulta æmulatione. Secundò, si horum insanias & naufragia, homines sapientes non laudent, non suspiciant, ac ne aspectu quidẽ suo dignos esse iudicent. Iucundè quendam audiui iocantem, tribus modis molestias humanas & miseras subleuari posse. Primum, si homines industrii, potentes ac diuites, non ita multum suspiciant: si viri mulieribus nimium non indulgeant: si sapientes stultos non laudent, eorumque facta non mirentur. Hæc enim ratione omnia contrahentura dicebat. Nam & potentes magis industriis opus habent, & mulieres viris, & stulti sapientibus. Vltimò, si aliquam publicam notam & infamiam hoc genus hominum referat. Locrensiū legislator, leges sumtuarias ciuibz suis præscripserat: in quibus cum muliebre luxuriam reprimere voluisset, legem huiusmodi tulit: Mulier aurea veste non vtatur, nisi meretrix videri velit. Quam infamiam cum omnes fugerent, abstinere omnes. At longè grauius & seuerius P. R. qui hoc genus hominum ordine suo mouebat: deinde ad extremum, inter homines capite censos referebat. Vocabantur autem capite censi, qui neq. sacramento rogabantur, nisi publicis tumultibus



tibus, idq. perrarò: neq. in populo suffragia ferebant. Quod quidè in his, qui à principio ex pauperibus nati sunt, paulò subdurius videri possit; in illis autem, qui decoxerunt, æquissimum erat. Nam si leges omnes illos infamia aliqua notant, qui remp. ciue priuant: quanto magis puniendi illi, qui seipfos & alios, nō inutiles modò, sed exitiosos & perniciosos etiam efficiunt? Sed ecce puerum, qui ad rationes audiendas nos vocat: & peropportunè. Nam & ego planè omnia dixi, quæ mihi hac de re nunc in mentem veniebant: & te iam fessum video. Hoc tamen addo, me nolle, vt hæc oratio nostra, sordidis & auaris hominibus, qui neque sibi, neque aliis profunt, & quos nullus magister meliores facere potest, patrocinari videatur:

*Est inter Tanaim quiddam socerumq; Viselli.*

Tuque caue, ne hæc nostra præsertim foras efferas. M. Nihil hoc ipsum moreris, nam & hæc vbique nota sunt, & illud item verissimum:

*Iliacos intm muros peccatur & extm,*

Vale. Vellem autem ad numerandam pecuniam

niam potius, quàm ad rationes audiendas,  
te hic puer vocasset.  
Sed abi.

Modus, optima virtus.









